

■ COLUMNA

Da temp en temp

ERWIN ARDÜSER*

Ablers da Vus vai da raschun era uschia. Per il solit varga il temp bler memia spert. Avair lungurella, nagut da far, esser laschent e laschar dar l'aura per ils lareschs è quasi in luxus.

Schizunt avant che metter a durmir ma van tras il chau milli chaussas che fissan anc da far. En tals muments na datti nagut auter che da prender in cedelin e far ina notizia per betg emblidar da liquidar la pendenza. Ils cedelins m'accumpognan lura durant il di, forsa era plirs dis, intgins schizunt emnas, e lura datti era tals che vegnan pir puspè a la glisch suenter mais.

Magari capiti era ch'jau na sun betg pli abel da decodar mia scrittira. La notizia sin il cedelin, la pendenza, ma fatschenta e m'occupa. Sto-



da chaussa! E sche quai fiss ussa stà insatge impurtanti-schem? Per il solit sa schlia il problem da sez. Ma per esser sincer, quels cedelins cun chavazzins criptics ma tentan magari fin en mes siemis.

Turnain dals cedelins al temp che varga bler memia svel. Cun vegnir pli vegl stuessi atgnamain esser pussaivel da planisar meglier il temp e da betg sfarlattar quel cun bagatellas. Gea, e na. Cun l'ir dals onns e decennis èsi bain pussaivel da relativar e metter sin pantun quai ch'è im-

purtant e quai ch'è main impurtant. Cun l'ir dals onns sa rimnan dentant era lavurs ed incumbensas da tut gener. Insacura vegn dentant il mument da metter prioritads e drizzar da nov il focus.

Da temp en temp vali la paina da metter prioritads. Era la lungurella, esser laschent e laschar dar l'aura per ils lareschs, pon insacura d'aventar prioritads. Questas prioritads pon per exempel era vegnir impundidas per reflectar davart il temp che varga bler memia svel e co nus pudessan impunder meglier quel.

Dapi ina bun'ura ma dumond jau ussa gia co quai fiss da laschar esser la columna columna, da trair en mes chalzers da viandar e far ina bella spassegiada d'atun.

*Erwin Ardüser abitescha a Laax e lavura en l'administraziun da RTR.